

Qanoq iliornikkut tusagassiortunngorusunneq annertusarsinnaanersoq pillugu apeqquteqaat aallaavigalugu Inatsisartunut oqallisissiasatut siunnersuut.

(Siunnersuuteqartoq: Aqqalu C Jerimiassen, Atassut)

Siumuminngaanniit Atassutip siulittaasuata, Aqqalu C Jerimiassenip oqallisissiaanut pingaaruteqaqisumut qujavugut.

Aqqalu C Jerimiassenip oqallisissiaa tusagassiortunik amerlanernik noqqaassuteqarpoq, tassanngalu tunngavilersuutigineqartut assigiinngitsut taakkartorneqarlutik, tassa tusagassiortut tutsuiginassusaat inuiaqatigiinni innarleqqanerarpaa, ilaatigut tusagassiortunngorusuttut taamaammat ikittarnerarpai, aammalu tusagassiortutut inuussuteqarnissaq qiviarneqartariaqartoq, tusagassiorfinnullu atugassarititaasut aamma ukkanneqartariaqartut.

2017/2018-imi KNR-ip illorsuassaanut nutaamut aningaasat immikkoortinneqarsimasut politikikkut pingaarnersiuinermi (sinerissap ilaani talittarfinnut aningaasat atorneqarsimanerat tunngavigalugu) Siumumiit isumaqarpugut KNR-ip illorsuartaarnissaanut aningaasassat ujarneqaqqittariaqartut, aningaasanut inatsisissamut ilutigitillugu. Ilisimavarpummi KNR-imi illorsuaq attartuinnagaasoq, atortullu immikkooqqarrallutik. Illorsuaq nutaarsuaq sulisussanut pilerinarsinnaassagaluaqaaq, kisianni aamma atortut nutaaliat pitsaanerit iluaqutaassagaluaqalutik. Illorsuarmili atortugikkaluaaraanni ulluinnarni sulinerup silaannaa aamma apeqqutaasaqaaq, sulisugissaaneq sulisunullu atugassaqartitsineq qitiulluinnartarput. Tassunga tunngasut susassaqrarfiup suliarisussaavaa, taamaammallu aqutsineq aammalu Tusagassiortut Peqatigiiffiat aammalu sulisut sinnerisa kattuffeqarfii tassaniipput, politikikkut susinnaanngisagut.

Susassaqrarfigisinnaasagut tassaapput aningaasaliineq, tusagassiuutinut isumaqatigiissutit, siulersuisunik pitsaasunik toqqaaneq, Nunatullu ileqqunik pitsaasunik pingaartitsineq.

Siumumiit ataasiarata saqqummiuttarparput pingaaruteqarluinnartoq tusagassiuuteqarneq pillugu isumaqatigiissuteqarnissat (medieforlig). Taamaattumik Siumumiit 2024-imi aningaasanut inatsisissamut atatillugu nuannaarutigeqaarput, tamatuma suliarineqarnissaa piumasaaqatigisimasarput suliarineqartussanngorsimanera. Sulialli tamatuma killiffia Siumumiit paasisaqrarfigissallutigu ujartussallutigulu ingerlatissavarput. Siumumiimmi kissaatigut ukiuni arlaqalersuni nutaamik tusagassiuutinut isumaqatigiissut nutarterneqarsimasoq aammalu ullutsinnut naleqqussakkamik siammaanissamut tunngavilik pilersikkusukkatsigu.



Ilisimavarput massakut KNR aqunneqarnermigut nutaamik inuttalerneqarnikoq, taamatuttaarlu siulersuit nutaat, siulittaasoq nutaaq, ikkunneqarnikuullutik.

Kulturimi Ataatsimiititaliap ataasiarnani maannamut KNR-ip pisortartaava siulersuisuulu naapittareerpai, tassanngalu paasinarpoq amerlasoorpassuartigut sulisoqarnikkut, suleqatigiinnikkut kisiannilu aamma Tusagassiornermi Ilinniarfik iliuuseqartoqartut, tamannalu pitsaasumik massakkumut sangutitserersooq tusarlerneqarluta, allaammi tusagassiortunngorniat amerlanerit ukiormanna qinnuteqarsimallutik. Paasissutissalli tamakkua qulaajaaffigilluassallugit pingaaruteqarpoq.

Tusagassiornerup Nunap kulturia, oqaasii inuusaasialu attatarivaat, inuiaqatigiinnut taakku tunniuttarpaat, taamaammallu Siumumiit tamanna pingaartilluinnaratsigu assorujussuaq sulissuteqarfigerusuttarparput.

Uggornartuuvoq ullumikkut amerlasuutigut oqaatsitsinnik nutsigaannarnik tusagassiortoqartalersimanagera, naak pisortaq, aqutsisut amerlanerit tusagassiortullu kalaaliugaluartut. Inuiaqatigiinnut paasissutissiineq pingaaqaaq, kisianni kulturitsinnik oqaatsitsinnillu pingaartitsigutta ersersinnerusariaqaleqqavarput tamanna pimoorullugu, tassa oqaatsitsinnik taamaallaat atorluta tusagassiiinnaanngornissaq ornittariaqavikkipput. Tamanna tupinnartuliaanngilaq, Nuna imminut ataqqisoq taamaattussaavoq, pingaartillugu oqaatsivut kingulissatsinnut eqqortut ingerlateqqissallugit.

Siumumiilli aamma eqqummaariffigaarput ullumikkut atortorissaarutit nutaat pigineqalersimanageri, kisianni aamma pingaartuuvoq paasissallugu meeqqaniit utoqqarnut tusagassiat sukkut paasineqartarneri, paasissutissiinerit aammalu aallakaatitassiat sukkut isiginnaarneqartarneri paasissallugit, radiokkut, nittartakkakkut tv-kkulluunniit. Siumumiilli ilisimavarput KNR massakut innuttaasunut paasiniaanissaminut qanittukkut aningaasaliiffigineqarnikuusoq, taamaammallu siornatigutut misissuinerit pinagit nutaajusumik paasiniaaneq ingerlanneqarniarpoq, tamanna pissanganartorujussuuvoq. Taamaalilluni siunissaq eqqarsaatigalugu qularinngilarput KNR-ip atuuffia pitsanngoraluttuinnassasoq, tamanna siulersuisuusut aammalu pisortap nutaajugaluarlutik pitsaassutsumik peqarluarnerat erseqqimmat.

Siumumiilli kulturitsinnik inuiaqatigiinnillu eqeersimaartunik pingaartitsigatta oqallisissiamut qujarusuppugut. Neriutiginaqaarmi pissaanerup sisamanik aggugaasup sisamaata pitsaasumik inissisimanissaa tamattaalluta maani pingaartilluinnarlugu ukkatarilissagipput, tamannalu Naalakkersuinikkut pingaartitsinermittoq isumaqarpugut. Aningaasaliissutit konto 40.90.16 aammalu konto 40.90.17 isigigaanni 90 mio kr missaanniittut takuneqarsinnaapput, taakkulu ilumut naammannersut qulaajarneqartariaqarput, tassami pissaanerup sisamaattut inissisimasutut taasaq taamak annikitsigisumik aningaasalersorneqarnera pissusissamisoornersoq nalilersortuartaqarpoq, saniatigullu tusagassiortunngorniarnermut aningaasaliissutigineqartuni 21 mio kr missaannik aningaasalerneqarsimasut imarisaat qiviarneqartariaqarput, tassami



imarisaanik ilinniakkallu soqutiginissusaanut tunngasinnaalluarmat
ilinniarusunngitsut unitsitsiinnartartulluunniit eqqarsaatigissagaanni.

Taamaammat Atassummit noqqaassutigineqartoq imartuupilussuuvoq, sorpassuit tunngaviupput
tusagassiornerup pitsaasumik kivinneqarnissaanut. Taamatut Siumumiit oqallissaarummut
oqaaseqarluta oqallissaarummut qujavugut.

Najaaraq Møller
Siumut